

եւ, առաջինից դէպի երկրորդը թափոնելով, կազմում են հիանալի ջրվեժներ: Մի տան կտուրը միւս տան համար բակի տեղ է ծառայում, եւ այսպէս, լեռների կուրծքին կպած տները աստիճանաբար վեր են բարձրանում եւ հասնում են մինչեւ ամենաբարձր գագաթները: Իսկ վտակները, վերելից հոսելով, ջրվեժների տեսարաններ են ներկայացնում: Ամեն կողմից ջուր է վազում, թէ աղբատին եւ թէ հարուստին բարիք է պարգեւում: Ջուրը անցնում է Ս. Սարգիս եկեղեցու աւագ խորանից եւ թափւում է նրա գաւիթը:

Գնում ես փողոցներով, յատակը քար, պատերը քար, ման ես գալիս պարտեզների մէջ, ցանկապատը քար, դռները քար, եւ այդ քարեղէն աշխարհը, արհեստի եւ բնութեան հրաշալիքների հետ միացած, սքանչացնում են քեզ: Դէպի որ կողմ եւ նայում ես, երեւում են ահաւորութիւն, վսեմութիւն, գեղեցիկ տեսարաններ: Նայում ես դէպի ցած, դէպի ծորի անդնդային խորութիւնը: Մի տուն միւս տան վրայ, մի պարտեզ միւս պարտեզի վրայ, աստիճանաբար իջնում են մինչեւ գետի ափերը, որ հոսում է ծորի խորութեան միջով: Իսկ այնտեղ, գետեզերքի բոլոր երկարութեամբ, տարածւում են քաղաքացիների այգիները եւ լցնում են ծորը հիանալի կանաչազարդութեամբ:

Նայելով այդ բոլորի վրայ, քո սիրտը բաբախում է մի վսեմ հպարտութեամբ, երբ տեսնում ես, թէ ինչպե՛ս հայ մարդը գիտէ մաքառել վայրենի բնութեան հետ, գիտէ լեռների ապառաժոտ անձկութեան մէջ իր համար մի դրախտ ստեղծել:

Աւելի հետաքրքիր էր շուկան: Հրապարակը գտնւում էր կտուրների վրայ, իսկ կտուրների տակում ծածկուած բազարը իր կրպակներով ու խանութներով: Չսովորած մարդու աչքում կարող էր այդ շատ օտարոտի երեւալ, եթէ չմտածէր, որ խնայող բաղեշցին, իր տեղի սղութեան պատճառով, աշխատել է նրա ամեն մի թիզից օգուտ քաղել: Ես ման էի գալիս կտուրների վրայ, այլ խօսքով, հրապարակում: Անցնելու տեղ չկար, մարդ, անասուն եւ թռչուն խառնուած էին միմեանց: Այնտեղ գիւղացի կանայք, խումբերով նստած, ծու, հաւ, սեր ու կարագ էին ծախում. այնտեղ կապած էին գիւղացիների աւանակները, որոնց վրայ բարձած, զանազան ուտեստներ էին բերել ծախելու. այնտեղ շարքով չոքած էր ուղտերի քարաւանը, որ գիւղերից ցորեան էր բերել. նրանց մօտ կիտած էր ցորեանի շեղջը: Այնտեղ ջուլիակը իր գործած կտան էր ծախում, իսկ ներկարարը՝ իր ներկած կարմիր շիլան. այնտեղ չիթսազը, իր պատրաստած չիթերը փոխում էր քուրդի հետ եւ նրանից իւղ, պանիր ու բուրդ էր առնում. այնտեղ թափառական չինգանան պար էր ածում իր կապիկը եւ փարաներ էր հաւաքում, իսկ քահանան մօտենում էր այս եւ այն ուտեստը ծախողին, մի պատառ վեր էր առնում, իր բերանն էր